

Set trieps ed almain 55 lufs

Almain 55 lufs – cun tants quinta l'Uffizi da chatscha e pestga actualmain en il Grischun.

PRISCA BUNDI E FABIA CADUFF/RTR


Quants lufs exact ch'i dat actualmain en il Grischun na po Arno Puorger, il responsabel per ils animals gronds da rapina da l'Uffizi da chatscha e pestga, betg dir. El quinta dentant cun almain 55 lufs. Trieps, pèrins e singuls. Il chantun quinta actualmain cun set trieps:

- San Bernardino
- Beverin
- Muchetta
- Val Gronda
- Piz Bargias
- Stagias
- Morobbia, sa mova sin il cunfin tessinais

Sper quai datti divers lufs singuls ed il chantun quinta che quatter pèrins sa chattian en il Grischun. Tranter auter er en la regiun dal Calanda. Là na quinta il chantun il mument betg pli cun in triep. Sco Arno Puorger declera: «Per esser in triep d'ovri numnadain almain trais lufs, ed in da quels sto esser ina femella.» Chagniels n'hai quest onn betg dà tants sco l'onn passà, il chantun ha dumbrà 14 tar ils trieps dal Beverin, Stagias e tar il nov triep dal San Bernardino. Arno Puorger aveva quintà cun daplirs. «Nus avain pensà ch'il triep a Val Gronda e Muchetta faschian pitschens, forsia perfin il triep dal Ringelspitz ed Calanda. Però igl è vegnì auter, igl è grev da far prognosas.» I è dentant pussaivel ch'i saja daplirs e ch'ins n'ha anc betg vis ulteriurs.

Grev da tegnair la survista

Insumma èsi grev da tegnair la survista da tut ils lufs en il Grischun. Il problem è tenor Arno Puorger «che tut ils lufs guardan ora tuttina. Per-



La preschientscha dal luf en Svizra.

GRAFICA CHWOLF

quai duvrain nus emprovas geneticas per savair sche igl è in luf u bain plirs lufs.» Vitiers vegn che las capacitads tar il labor a Losanna èn limitadas.

Schliaziun è la revisiun da la lescha da chatscha federala

Divers lufs fan era problems. Cunzunt il triep dal Beverin ha adina puspè attatgà animals da niz, per part era gronds. Perquai ha il chantun fatg la dumonda da regular quest triep e da sajettar il bab dal triep. Questa dumonda è dentant vegnida refusada dal Uffizi federal da l'ambient. Il chantun ha fatg recurs tar il Tribunal federal administrativ.

Per pudair simplifitgar als chantuns da regular ils lufs, dovra quai tenor il cusseglier guvernativ responsabel Mario Cavigelli exnum

ina revisiun da la lescha da chatscha federala. «La finamira sto esser dad avair ina revisiun da la lescha da chatscha federala che lubescha da reducir il dumber da trieps sco era da singuls lufs» di Mario Cavigelli. Sin il palc federal èn gia diversas propostas en discussiun.

Ils chantuns da muntogna èn entant sa mess ensemen per avair daplì forza, ed han lura er la pussaivladad da plazzar lur arguments en las cumissiuns responsablas, uschia Mario Cavigelli. El declera vinavant «la pli gronda sfida èn las regiuns, nua ch'igl ha trieps. Quai è ina tut altra problematica. Igl è garantì ch'ils trieps vegnan a crescer. Tge che vegnia allura era a crear sensibilitad en auters chantuns da muntogna, forsia era agl ur da la zona alpina ed allura forsia era en la Bassa.»

Betg simpel da regular il luf

Questa primavaira ha il Cussegl federal reagì sin squitsch or dal parlament ed ha adattà l'ordinaziun da la lescha da chatscha. Cun ina consultaziun pli curta èsi reussì da pudair metter en vigur las novas directivas durant la stagiun d'alp da quest onn.

Da nov bastan 10 stgarpadas da nursas u chauras per ch'in chantun dastga regular la populaziun da lufs. Enfin ussa dastgavan ils chantuns far quai a partir da 15 animals stgarpadas. Quella regla va la dentant be, sch'ils purs han prendì mesiras da protecziun per lur animals. Tar animals da niz gronds – biestga, chavals u lamas – bastan duas stgarpadas, ha il Cussegl federal precisà vinavant.

Chantuns da muntogna betg cuntents

Dentant na cuntentan quellas adattaziuns betg ils chantuns da muntogna. Oravant tut politicras e politichers burgais vulan pudair schluppettar pli simpel il luf. En il parlament datti differentas moziuns u interpellaziuns che s'occupan cun la bestga rapina. Tranter auter stat era puspè ina revisiun da la lescha da chatscha sin il program. Quella proposta vegn da la cumissiun per ambient, planisaziun dal territori ed energia (UREK) dal cussegl dals chantuns.

Era regulaziun preventiva en discussiun

La derasaziun dal luf duai pudair vegnir franada preventivmain cun in'adattaziun da la lescha da chatscha. Ins duai pudair sajettar lufs era da moda preventiva, uschia sco ils capricorns. La cumissiun vul controllar pli fitg la derasaziun dal luf. Avant ch'in sboz vegn dentant elavurà sto anc la cumissiun correspundent dal Cussegl nazional dar il consentiment. Quella ha spustà la discussiun sin l'entschatta da proxim onn. Tut ils projects pendents enturn il luf vul'ins tractar ensemen. Uschia che ord il parlament federal pon ins spetgar moviment en chausa l'emprim quartal dal 2022.

Resistenza programmada

Pro Natura ha ditg sin dumonda dad RTR ch'ella n'è insumma betg d'accord cun la proposta da la cumissiun per l'ambient dal cussegl dals chantuns. Tenor l'organisaziun d'ambient na resguarda la cumissiun betg la decisiun da la populaziun ch'ha ditg NA a la revisiun da la lescha da chatscha la fin da settember 2020. La regulaziun preventiva dal luf è vegnida refusada a l'urna da la populaziun. Dad ussa vegnir cun quasi la medema proposta ch'era en votaziun saja ina decisiun a la svelta e malponderada. (rtr/fmr)

Co van ins enturn cun il luf en la Bassa ?

Basilea-Champagna, Berna e Turitg han vuschà cunter la revisiun da la lescha da chatscha che vuleva tranter auter ch'il luf po vegnir regulà pli simpel. Dentant han era quels chantuns adina puspè visitas dal luf. Co van ils chantuns enturn cun las visitas nunusitadas?

Tar l'emprova da far ina revisiun da la lescha da chatscha ha ins pudì observar che chantuns muntagnards han plitost sustegnì quella entant che chantuns urbans han plitost vuschà cunter. La revisiun vuleva tranter auter ch'i duai vegnir pli simpel da schluppettar il luf.

En il Grischun è il luf in tema permanent. Lufs vegnan adina puspè observà e procuran en la politica ed en la populaziun per discussiuns. Dentant betg mo en il chantun Grischun sa dera il luf adina pli fitg. L'animal chatta era la via en autras parts da la Svizra. Uschia sa preparan divers chantuns, nua ch'il luf vegn vesì sporadicain, per pudair pussibilitar ina convivenza d'uman e luf.

Tema sporadic en il chantun Turitg

En il chantun Turitg è il luf in visitader rar. En media pon ins cumprovar ina giada l'onn ina observaziun dal luf. L'emprima giada il 2014. Tenor Wolfgang Bollack, il pledader da medias dal chantun da Turitg responsabel, daventa il luf en quel mument ch'el vegn vesì in tema en il chantun. El di «quai n'è anc betg palpabel per nus, quai è be punctualmain in tema ellas medias.» Dentant la discussiun svanescha uschè svelto sco ella è arrivada. Ins va però da quai ora ch'i pudess dar en avegnir daplì lufs singuls che vegnan observads en il chantun da Turitg. I na vegn era betg exclus ch'i pudess sa furmar en avegnir in triep. Per pudair infurmar la populaziun ed oravant tut l'agricultura dal visitader datti in alarm d'SMS. Per il mument n'è il luf dentant betg in tema che brischa a Turitg. Era en il parlament n'è quel betg en discussiun. Auter sa preschenta la situaziun en il chantun Berna.

Paucs lufs dentant gronda canera – Situaziun a Berna

En il parlament dal chantun Berna è il luf arrivà. Diversas moziuns èn vegnidas inoltradas. La preschientscha dal luf è s'augmentada ils davos onns. Lufs residents datti dentant mo paucs, ma adina puspè passa in u l'auter sin il territori dal chantun Berna. Questa primavaira han ins era schluppettà in emprim luf a Berna – ina luffa che ha stgarpà passa 50 animals da niz. Quai ha chaschunà anc pli grondas discussiuns tranter aderents ed adversaris dal luf, di l'inspectur da chatscha Niklaus Blatter. El va era da quai ora ch'il luf vegn a sa dera a Berna. Avunda plaz avess il chantun. Ins possia profitar da chantuns che enconuschan gia meglier il luf, di Blatter. Era cun il chantun Grischun èn ins adina puspè en contact. Pli baud u pli tard pensa l'inspectur da chatscha ch'i vegnia era a dar in triep en il chantun Berna.

Interessà, ma betg polarisà – Situaziun a Basilea

Quest onn è il luf stà per l'emprima giada sin visita en il chantun Basilea-Champagna. La populaziun ha reagì quieta ed interessada, di il responsabel per chatscha e pestga Holger Stockhaus. Mo el agiungia tge la dumonda è «co vegn la populaziun a reagir cura tge il luf è qua avon esch chasa.» Questa giada è l'agricultura restada calma. I è stà in eveniment interessant. Ins suppona ch'in luf è en gir en la regiun Basilea-Champagna, Soloturn ed Argovia.

Uschia ha l'emprima visita dal luf dentant era purtà 7 nursas e chauras mortas. Cun la DNA han ins pudì mussar si ch'igl era il luf. Era quai n'ha betg procurà per grondas discussiuns en la populaziun di Stockhaus. Cun quai che Basilea-Champagna è fitg populà ed i n'ha betg gronds territoris adattads per il luf na tem'ins era betg ch'ins pudess avair in di in triep. Holger Stockhaus è fitg interessà da vesair co l'inscunter cun il luf vegn a sa sviluppar en la populaziun e sche quai ha in influenza sin la tenuta. (rtr/fmr)